



IL CUSSEGL GROND HA APPROVÀ LA REVISIUN PARZIALA DA LA LESCHA DA TAGLIA

Il cussegl grond ha discutà ils 31 d'avust 2012 la revisiun parziala e l'ha acceptada cun 74 cunter 15 vuschs.

La revisiun parziala fa numerusas adattaziuns al dretg federal. Ultra da quai duai vegnir creada la basa giuridica per introducir il traffic da datas sin via electronica tranter il pajataglia e las autoritads da taglia. In'ulteriura finamira da la revisiun è quella da mantegnair l'attractivitat dal Grischun sco piazza economica.

1. Adattaziun al dretg fiscal federal

I sa tracta per gronda part d'adattaziuns che la confederaziun prescriva stringentamain als chantuns:

- **Taxaziun da las participaziuns da collavuraturs:** La participaziun da collavuraturs ad ina persuna giuridica vegn fatga principalmain tras *aczias* u tras *opziuns*. La patruna porscha talas a ses collavuraturs per in pretsch spezial u gratuitamain. Ina tala participaziun duai augmentar l'identificaziun cun l'interpresa. L'attribuziun d'aczias u d'opziuns da collavuraturs signifitga in *entrada or d'activitad da gudogn dependenta*. Tar tut las participaziuns da collavuraturs sa tschenta la dumonda cur che l'entrada vegn realisada. Quai vegn reglà da nov en la lescha ed augmenta pia la segirezza giuridica.
- **Liberaziun da taglia dal sold da pumpiers:** Il dretg federal prescriba ch'il sold dals pumpiers da milissa è liber da taglias. Suttamess a la taglia restan percenter ils supplements pauschals per il cader sco er ils supplements da funcziun. En il *Grischun* vala quai gia oz. Tar la confederaziun è limità il sold liber da taglia ad in import maximal annual da 5 000.– francs. L'import maximal per la taglia chantunala vegn medemamain fixà a 5 000.– francs. In sold da passa 5 000.– francs è suttamess a la taxaziun mo per quel import che surpasa ils 5 000.– francs. I sa tracta d'in *import liber da taglia*.
- **Taxaziun tenor ils custs:** Questa taxaziun duai restar uschia er en l'avegnir. Il cussegl grond ha refusà cun ina clera maioritad ina proposta d'eliminar la taxaziun tenor ils custs. La giustia fiscal e l'acceptanza da la taxaziun tenor ils custs duai vegnir meglierada. Quai vegn fatg tranter auter uschia, che la basa da fixaziun minimala (= l'entrada che furma la basa da la calculaziun) duai vegnir fixada tar la confederaziun a 400 000.– francs. Ils chantuns ston medemamain fixar ina basa da fixaziun minimala, è dentant libers da fixar l'import da quella. La cumpetenzza da fixar quest import vegn surdada a la regenza.
- **Taxaziun dals gudogns da lottaria:** Mintga singul gudogn fin 1 000.– francs è liber da taglia e n'è er betg suttamess a la taglia anticipada. La deducziun dals custs da messa importa 5 % dals singuls gudogns resp. maximalmain 5 000.– francs. Ultra da quest import na pon vegnir deducids nagins ulteriurs custs.

2. Binaris per l'avegnir

- **Ina taglia sin il gudogn pli flexibla:** En il dretg vertent na dastga la differenza dals pes da taglia da la taglia sin las entradas e da la taglia sin il gudogn betg surpassar 10 puncts procentuals. Questa limita vegn abolida cun la revisiun parziala. Il *cussegl grond* daventa uschia pli flexibel. En il futur po el agir sur il pe da taglia, quai vul dir senza midar la lescha da taglia (tariffa da taglia). Uschia vegn creada la premissa per pudair reagir svelt ed en moda effizienta sin las relaziuns midadas en ils auters chantuns e per pudair mantegnair er en l'avegnir l'attractivitat dal Grischun sco piazza d'interpresas.
- **Traffic sin via electronica:** Il chantun sa prepara vinavant per l'era electronica e creescha la basa legala per ch'i saja pussaivel er en il Grischun d'emplenir la decleraziun da taglia sin via electronica, d'endatar e da tegnair en salv datas sin via electronica sco er da facturar/disponer las taglias sin via electronica.

3. Interest chantunals

La revisiun parziala realisescha differents interest chantunals. En spezial ston vegnir menziunads ils suandants puncts:

- **Taglias sin immobiglias:** Oz na pon ins betg deducir ils custs da mantegniment sco taglias sin immobiglias, tar la confederaziun dentant bain. Per evitar questa regulaziun divergenta tranter la confederaziun ed il chantun *duai vegnir permess da deducir* las taglias sin immobiglias er en il chantun.
- **Taglias sin il gudogn tras la vendita da bains immobigliars:** Oz vegnan ellas savens garantidas dal cumprader pervia dal dretg da pegn legal. Il probabel import fiscal vegn pajà en in conto bloccà u en in conto da clientella dal funzionari da documentaziun. Tals contos na portan praticamain nagins tschains e chaschunan ultra da quai custs. Empè da la garanzia duai il probabel import fiscal che resulta pudair vegnir assegnà da nov directamain a l'administraziun chantunala da taglia. Sin *pajaments anticipads* vegn indemnità in tschains che corresponda al tschains da bunificaziun.
- **Termins da pajament:** Ils lungs termins da pajament actuals da 90 dis duessan – tenor l'avis da la regenza – vegnir scursanids a la dimensiun usitada da 30 dis. Suentar che la cumissiun predeliberanta per economia e taxas aveva permess da scursanir mo a 60 dis, è il cussegl grond s'exprimì cun 55 cunter 37 vuschs cunter mintga midada e pia a favur da mantegnair il *termin da 90 dis*.

4. Entrada en vigur

La regenza fixescha l'entrada en vigur da las singulas disposiziuns. Cun excepziun da las novaziuns davart la taxaziun tenor ils custs e sin ils gudogns da lottaria entra questa revisiun parziala en vigur il 1. da schaner 2013. Resalvà resta in eventual referendum.